

**Badan Amal Jangan Putus Asa Bantu Kanak-kanak OKU – Rosmah  
Bernama  
6 Ogos, 2012**

PETALING JAYA, 6 Ogos (Bernama) -- Isteri Perdana Menteri Datin Seri Rosmah Mansor hari ini meminta semua badan amal agar tidak berputus asa dalam menyediakan pelbagai program yang dapat mempersiapkan kanak-kanak Orang Kelainan Upaya (OKU) ke tahap yang lebih tinggi.

Beliau berkata waima sekalipun keadaan golongan itu, masyarakat tidak boleh sesekali terlepas pandang terhadap kebajikan kanak-kanak istimewa itu kerana mereka juga mempunyai kelebihan masing-masing, bahkan mungkin lebih hebat daripada kanak-kanak yang sempurna sifat.

"Tingkatkan kolaborasi dengan pelbagai pihak, tidak kiralah pihak kerajaan, golongan korporat mahupun individu supaya mereka (OKU) sentiasa menjadi sebahagian daripada masyarakat," katanya dalam ucapan pada majlis penyampaian sumbangan Hari Raya Aidilfitri di Pasaraya Mydin, Subang Jaya di sini.

Teks ucapan beliau dibacakan Pengerusi Jawatankuasa Kebajikan, Badan Amal dan Kebajikan Tenaga Isteri-Isteri Menteri dan Timbalan Menteri (Bakti) Toh Puan Dr Aishah Ong.

Rosmah juga berharap agar tiada lagi kekangan minda dalam kalangan ibu bapa mahupun guru-guru dan masyarakat untuk mendidik anak-anak ini, supaya mereka dapat meneruskan kehidupan yang lebih baik.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=685871>